

CÁTEI LÉ BURI LARÚFUDUBEI BÚNGIU LUN JUAN

Cátei arúfudúati buri lun Jesucrístu

1 ¹Niján buri cátei le larúfudubei Búngiu lun Jesucrístu lun lasúbudiragüdüni joun lánigu cátei lé buri lúnbei lasúsuredun madíse. Subúdigüda láali Jesucrístu cátei le lun Juan le esériwidubei lun, láu loúnajani láni ánjeli lúmoun lun larúfuduni lun. ²Aríñaga láali Juan inárüni luágu sun le laríjubei, geféenti luágu láni Búngiu ugánu luma luágu le aríñaga láalibei Jesucrístu.

³Gúndaatiña gürígia ja alíjabin ja má ja agáambubalin laliijoún ugánu le, le erésibirúabei lúmagiñe Búngiu, adúga jagía gásu láu cátei le bürüwañubei ya, ladúga yaráfaali dan lun lasúsuredun.

Labúrüjan Juan joun tílana sédügubei ligílisi

⁴Áu Juan, nabúrüjaña joun tílana sédü ligílisi to Ásiaboun. Resíbi jumá abíniruni luma darángilaü lúmagiñe Búngiu le wínwanbei lúmagiñe lubáragiñe furúmiñeti dan, wínwan ligía guetó, wínwan ligíame sun dan. Resíbi jumá gíñe abíniruni luma darángilaü jámagiñe sédü espíritugu ja ligíbugiñebaña lála, ⁵luma lúmagiñe Jesucrístu le aríñagubalin cátei le inárüti, le furúmiñebeí ásaaruti lídaangiñe ouweni áni gabáfu ligía jawágu urúeigu ja ubouagubaña. Jínsiñetiwa lun Crístu, áni chibá laadiwa lídaangiñe wafígoun láu líta, ⁶adúga láadiwa urúeigumé luma fádirigumé lun wesériwidun lun Lubúngiute, le méme Lúguchibei. ¡Rúalá uweíríguni luma ubáfu lun, lun súnwandan! Ítaralá.

⁷¡Aríja jumá, liábinba Crístu juánriñurugu, jaríjubei sun gürígia ásta gíñe ja áfarubalin! Jayájuba sun gürígia ja ubouagubaña dánme le jaríjini luágu wuríbani le adúga jamáalibei. Ítara lúba.

⁸“Áu lagúmesejabei sun cátei, áu lagúmuchagülebei, quei létüra ‘A’ luma ‘Z’ ”, líña laríñagun Búngiu le Súnti Gabáfu, le wínwanbei lúmagiñe lubáragiñe furúmiñeti dan, wínwan ligía guetó, wínwan ligíame sun dan.

Layáwadagun Crístu lun Juan

⁹Áu Juan, jidúje lueígiñe Jesucrístu áu, gafánraantina júma lídan larúeijan Búngiu, sífurijadina úara júma luágu Crístu, resíbijadina gíñe gurásu lúmagiñe Crístu. Reídeitina adaüríwa luágu uboúju le gíribei Pátmos lueígiñe napúrichijani Lerérun Búngiu, lúma lueígiñe napúrichijan luágu Jesucrístu. ¹⁰Luágu ában wéyu dimáasu, ába neréderun lábugiñe lubáfu Sífiri Sándu, ába nagáambun ában umálali reínti nanágangiñe quei lumálali fídu, ¹¹larínaga umálali ligía nun.

—Áu furúmiñebei lúma agúmujoúni, quei létüra ‘A’ lúma ‘Z’.
Abürüjabeí sun le baríjubei, ábame boúnajanun gárada tugúya joun tílana sédü liglísi to loúbawaguboun Ásia. Éfeso, Esmírna, Pérgamo, Tiatíra, Sárdis, Filadélfia lúma Laodicéa.

¹²Ába nagáraragun lun naríjin ca lan adímurejabeí nun, ába naríjin sédü lébu sanúdelu gólu, ¹³labádinagua sédü lébu sanúdelu ligía ába naríjin ában camá jamuga Wügüri Garaúwartügüti—le Jesucrístubei—táu ában anáanguni chÜlútu luágun lugúdi, lúma ában béli ti gólu yaráfa lun laníguagu. ¹⁴Jarúti lídiburi quei lífu mudún, quei moúru, ítara líña lágu quei wátu geméti. ¹⁵Miríti lugúdi quei brónse le írichawagúaa li, le dáwaali lídoun órno, reínti lumálali quei lireín lefbaagun sarágu dúna. ¹⁶Níñanu sédü warúguma lídan lújabu le loúnwenren, níñoun ában efeín gágiritu liyúmulugugiñe, biángua tamána. Ítara líña ligíbu quei wéyu dan le lásüdün láu sun lére.

¹⁷Dan naríjinbalin, ába náburujan lubádu lugúdi camá jiláadina. Ába líchuguni lújabu le loúnwenren nuágu, ába larínagun nun.

—Manúfudedaguabá, áu le lagúmesejabeí sun cátei, áu lagúmuchaja.
¹⁸Áu le wínwanbei, jilátina, guetó wínwantina lun sun dan. Níjein ligélen ouweni núma, lúma ligélen fulásu le ní jabeí jiláguaaña. ¹⁹Abürüjabeí lubeíti le baríjubei, le guetóbei lúma le lúnbei liábin. ²⁰Niján laníchigubei jawáguti sédü warúguma ja baríjubaña lídan nújabu le noúnwenren, lúma sédü lébu sanúdelu gólu. sédü warúguma, jagía sédü joúniri tílana sédü liglísi, sédüti lébu sanúdelu, jagía sédü liglísi.

Ugánu joun tílana sédü liglísi. Ugánu joun tílana liglísi Éfeso

2 ¹Babürüja lun joúniri tílana liglísi to Éfesoboun, baríñagame lun lun larínagun joun gürígia jagía. “Ítara líña naríñagun, áu le jáubei sédü warúguma lídan nújabu le noúnwenren, le gíñe eíbugubei labádinagua sédü lébu sanúdelu le gólu. ²Subúdi numúti sun le jadúgübei, subúdi numúti lidére juwádigimari lúma jagúraasun, áni subúdi numúti luágu siñá lan jáfaguniña ja wuríbabaña. Subúdi numúti luágu jóuchagua jumáaña lan ja aríñagubaña luágu apóstolugu jamá áni máma apóstolugu jagía, áni darí jumaali luágu ye jamá. ³Gagúraasunjadün, áni sífuri jugúya sarágu lídan juwádigimari nuágu, mabúcharunga juágu. ⁴Láu sun líra, níjein ában cátei jadúga magúndaantina láu. maweírinjali nínsiñe jun queí meja furúmiñe. ⁵Ligía lubeíti, jarítagua

jumá ída jíña lán meja, sáansi jumeí jigábury, adúga jumeí cátei lé meja jadúgübei furúmiñe. Ánjein madúgün jumá ítara, nídinba juágu furése, ábame nagídaruni lébu jisáandelun lídaangiñe lufúlasun, ábame mámaadün lan tílana nilgílisin, ánjein gubeírügü jasáansira jigábury, ligíaba madúgün náni ítara. ⁶Láu sun líra, luáguñein jáni fuleísei, liyéreegun cátei lé buri jarúfudajabei nicoláitagu jun lúma buri cátei le jadúgübei, le gíñe iyéreegubei nun. ⁷Le garígeirugubei lun lagáambun, agáambaleí le laríñagubei Sífiri Sándu joun tílana buri ligílisi. Ja ásiiragúbalin wuríbani, neígagüdübaña lídaangiñe lin tídibu wéwe to lánina ibágari, to lufúlasunruguboun Búngiu.”

Ugánu joun tílana ligílisi to Esmírnaboun

⁸Babúrüja lun joúniri tílana ligílisi to Esmírnaboun, bariñagame lun lun laríñaguni joun gürígia jagía. “Ítara líña naríñagun, áu le furúmiñeti lúma agúmujoúni, lé meja ouwebei áni wínwanyaali. ⁹Subúdi numúti sun le jadúgübei, subúdi numúti jasúfurirun lúma jugúdeme, láu sun lídan lan linárün cátei, rísi jumá. Subúdi numúti gíñe luágu adímureja jamá ja aríñagubaña luágu juríu jamá wuríbati juágu, máma ámu cátei jagía lueídügüya lánigu jamá Máfia. ¹⁰Manúfude jumá lueí le lúnbei jasúfuriruni, ládaraguba Máfia fiú jídaangiñe furísunrugun lun louchwagúniwa jafñen sun jugúya, áni jasúfuriruba sarágu luágu dísi wéyu. Derégüdagú jumá lídan jafñen nuágu darí joúnwen, ábame níchuguni ibágari magúmuchaditi jun, jafáyeiruájame. ¹¹Le garígeirugubei lun lagáambun, agáambaleí le laríñagubei Sífiri Sándu joún buri tílana ligílisi. Ja ásiiragúbalin wuríbani, másügürünbaña lídaangiñe libíaman ouweni.”

Ugánu joun tílana ligílisi to Pérgamoboun

¹²Babúrüja lun joúniri tílana ligílisi to Pérgamoboun, bariñagame lun lun laríñagun joun gürígia jagía. “Ítara líña naríñagun, áu le gámabarun efeín to gágiriboun, to biánguaboun amána. ¹³Subúdi numúti sun le jadúgübei, subúdi numúti gíñe luágu Máfia lántima gabáfubei jádan gürígia ja ní lubei jagánawa, áni láu sun líra, númamemeñadün. Mígirun jumágili jafñen nuágu, ni íbini lídan dan le láfarúnbei Antipás le geféenbei buíti nuágu ñi lídan fulásu le ñi jubei, le ñi lubei lagúmadija Máfia. ¹⁴Láu sun líra, níjein buri cátei jadúga, magúndaantina láu. luágu añájein lan fiú gürígia júma yára Pérgamo ja májabaña jígiruni cátei lé meja larúfudajabei Baláam, le íchugubei dimúrei lun Balác lun laffigoungüdüniña Israelítagu láu jeígin eígini le adágarawagüdúti joun sándu, lúma láu jabágaridun lídan salúfuri. ¹⁵Ítara méme gíñe, añájein ja májabaña jígiruni cátei lé buri jarúfudajabei nicoláitagu júma ñi, cátei le iyéreegubei nun. ¹⁶Ligía, sáansi jumeí lubeí jigábury, ánjein madúgün jumá ítara, nídiba juágu madíse, ábame nageíndagun jáma gürígia ja adúgübalin cátei buri le, táu efeín to áfuriduboun niyúmulugugiñe. ¹⁷Le garígeirugubei lun lagáambun,

agáambaleí le laríñagubei Sífiri Sándu joún buri tílana ligílisi. Le ásiiraguti luágu wuríbani, neígagüdüba lídaangiñe maná le arámudúañubei lun lun líchugun érei tun luwáni, ábame níchugun ában dúbü jarúti lun láu ában íri iséri búríwañu luágu le ibídiñeti ni ca un luefidügüya lun le erésibirubalin.”

Ugánu joun tílana ligílisi to Tiatíraboun

¹⁸‘Babürüja lun joúniri tilana ligílisi to Tiatíraboun, baríñagame lun lun laríñagun joun gürígia jagía. “Ítara líña naríñagun, áu le Liraú Búngiu, le ítarabei águu quei wátu geméti, liábin lugúdi quei brónse le írichawagúaaali. ¹⁹Subúdi numúti sun le jadúgübei, subúdi numúti jísiñejabu, jafíñen, jesériwidun láu jugúraasun, subúdi numúti gíñe luágu jadúgüña lan cátei buíti guetó lueí meja furúmiñe. ²⁰Láu sun líra, níjein ában cátei jadúga magúndaantina láu. Jígirunun Jezabél to aríñaguboun luágu proféta tan áni máma líña, lun teyéeduniña gürígia láu tarúfudajan joun nánigu lun jaganouñ lídan salúfuri lúma lun jeígin eígin le adágarawagüdúti joun sándu. ²¹Rújadina dan tun lun tasáansiruni tigáburi, májagiru tígiruni tisálufurin. ²²Ninárün jáu luágu náburugüdaaru lan láu sándi lun jasúfurirun ja adáagubaña salúfuri túma ánjein mígirun jamá jadáaguni cátei lé buri tadáagubei, ²³ábame náfaraguniña tirájüñü jilágubei, ítara lúba jasúbudiruni sun nánigu luágu subúdi náni lében arítaguni lúma tében anígi, ábame nafáyeiruni cára ában jídaangiñe según le ladúgübei. ²⁴Ja jíbiri ja Tiatíraña, ja mafálarubalin arúfudajani ligía, machúlügiña gíñe asúbudirei le únbei jagúara lujúlilin láni Máfia cátei le arámudaguabei, míchubadina ámu anúgüni jawágu. ²⁵Ragújumei lubuídun jigáburi darí niábin. ²⁶Ja ásiiragúbalin wuríbani, adúga méme jameíme le nabúseerúbei ladúgún darí lun joúnwen, níchuguba ubáfu joun luágu buri fulásu, ²⁷ítara quei líchugun Núguchi Búngiu ubáfu nun. Ábame jedéragüdüni jagúmadiruni fulásu buri quei láu ában murúsun gürábu, ábame jamúrugudaguni wuríbani queísi sóudieru le láuti múa. ²⁸Níchuguboun gíñe warúguma to lánina bináafin joun. ²⁹Le garígeirugubei lun lagáambun, agáambaleí le laríñagubei Sífiri Sándu joún buri tílana ligílisi.”

Ugánu joun tílana ligílisi to Sárdisboun

3 ¹‘Babürüja lun joúniri tílana ligílisi to Sárdisboun, baríñagame lun lun laríñagun joun. “Ítara líña naríñagun, áu le jáubei sédü espíritugu láni Búngiu jáma sédü warúguma. Subúdi numúti sun le jadúgübei, subúdi numúti luágu jiláñu jíña lan lún buri cátei le nuáguti, láu sun aríñawagúa lan luágu wínwan jumá. ²Agágudúa jumá, rújuma érei lún buri cátei le níjeinguabei, lubáragiñe loúnwen, aríja náali luágu múaran lan le jadúgübei ligíbugiñe Búngiu. ³Jarítagua jumeí lubeíti le arúfudajoúbei jun, falájumei, sáansi jumeíme jigáburi. Ánjaün magágudun, nídiba juágu quei liábin ában jíweruti ibídiñoun óra jun. ⁴Láu sun líra,

añájein fiú güirígia jagánagua ñi Sárdis ja múaradungiñábaña lúma wuríbani, jagía jeíbuguba núma táu anáanguni jarútu ladúga yúuti joun. ⁵Ja ásiiragúbalin wuríbani, jadáuraguba anáanguni jarútu, áni magídarun nubeí jírí tídaangiñe líburu to gáubalin jírí ja lúnbaña jabíjini ibágari magúmuhaditi, arúfudarügü nubáña quei nánigu ligíbugiñe Núguchi Búngiu lúma jagíbugiñe láni ánjeligu. ⁶Le garígeiruguti lun lagáambun, agáambaleí le laríñagubei Sífiri Sándu joun tílana buri ligílisi.”

Ugánu joun tílana ligílisi to Filadéfiaboun

⁷Babúrúja lun joúniri tílana ligílisi to Filadéfiaboun baríñagame lun lun laríñagun joun. “Ítara líña naríñagun, áu le sándubei, le gíñe inárüinbei, le gámabalin ligélen urúei Davíd, le úabei ni ában gayáraati ladáuruni le nánjunrenchubei, siñá lánjunrenchuni ni ában le nadáurubei. ⁸Subúdi numúti sun le jadúgübei. Rújadina ában béna júnren jigíbugiñe le lásiñerun ni ában adáura, ladúga láu sun lougua lan jére, adúgaadün gásu láu nugúmadin, áni meyéeraguntün luágu nánigu jumá. ⁹Aríja jumá, nadúgüba lun jayábin lánigu Máfia ja yéebaña, ja aríñagubaña luágu juríu jamá áni mabágariduntiña queísi lánigu Búngiu, ábame nájuduraguagüdüniña jigíbugiñe lun jasúbudiruni luágu jugúya lan numútuniñabaña jínsiñetiña nun, ninárün jáu. ¹⁰Areída jumáali nugúmadin lun gagúraasun jumá, ligía nareídubadün lubeí lueí lidáani oúchawagúni le lúnbei liábin luágu sun uboú lun jouchúniwa sun ja uboúagubaña. ¹¹Madísebei niábin, mígira jumeí ni ában lun lagídaruni jaffínen nuágu, meféridirun jumámuga ni cátei lídaangiñe le lúnbei níchuguni jun. ¹²Ja ásiiragúbalin wuríbani, níchugubaña quei wagábu tídan Lúban Nubúngiute, máfuridundügiyaañame nígiñe, ábame nabúrüdüni líri Nubúngiute jawágu lun lasúbudirúniwa luágu lánigu jamá, lúma líri ubúru le láni Nubúngiute, le iséri Jerusalén le ñúbinbei siélugiñe lúmagiñe Nubúngiute, nabúrüdübei gíñe iséri níri jawágu. ¹³Le garígeiruguti lun lagáambun, agáambaleí le laríñagubei Sífiri Sándu joún buri tílana ligílisi.”

Ugánu joun tílana ligílisi to Laodicéaboun

¹⁴Babúrúja lun joúniri tílana ligílisi to Laodicéaboun, baríñagame lun lun laríñagun joun. “Ítara líña naríñagun, áu le inárüinbei, le gaféenbei buídu, le aríñagubalin inárüni, le ídaangiñebei liábin sun cátei le ladúgübei Búngiu. ¹⁵Subúdi numúti sun le jadúgübei, subúdi numúti luágu madíli jumá lídan jesériwidun nun, másü jugúya. ¡Dilígubeijadün jamúga o sújuma! ¹⁶Quei bachárügü jubeí, madílitün, másü, newérebabadün niyúmulugugiñe. ¹⁷Aríñagatün luágu rísi jumá, luágu buídu lan dan jun, luágu memégeirun jumá ni cáta, áni maríjin jumúti luágu fugiábu jumá, gudémetün, maríjintün, surúsu jíña. ¹⁸Ligía níchugunbei dimúrei jun lun jagáñijan gólu le affnujóuaali láu wátu gemetí númagiñe, lun rísi jumá le tímatimaati, lun gíñe jagáñijan anáanguni

jarútu núma lun jadáuragun láu jasúrusujan, lúma árani lun jíchuguni lídoun jágu lun jarjín. ¹⁹Ébecha numútiña ja jínsiñebaña nun láu idérei, arúfudaja áu joun. Lúnti lubeíti sériu jumá, sáansi jumeíme jigáburí. ²⁰Anája bénabu, nagúajaña, le agáambuti numálali, ába lánjunrenchuni béna nubá, nebéluruba lúmoun, ábame neígin lúma, jou ligíame núma. ²¹Ja ásiiragúbalin wuríbani, níchuguba ubáraü joun númagua luágu nála le lála urúei, ítara quei násiiraguni wuríbani, ába nañúurun lúma Núguchi luágu lála. ²²Le garígeiruguti lun lagáambun, agáambaleí le laríñagubei Sífiri Sándu joun tílana buri liglísi.”

Ájuduraguni lun Búngiu, siélu

4 ¹Lárigiñe sun cátei le, ába naríjin ában béna júnren siélu, liábinti umálali le ítarahei quei lumálali fídu, lé buga adímurejabei nun, ába laríñagun nun.

—Weínba ñájoun, narúfudaali cátei lé buri lúnbei lasúseredun lárigiñe buri le bun.

²Lídan óra ligía, ába neréderun lábugiñe lubáfu Sífiri Sándu, ába naríjin ában lála urúei siélu láu Búngiu ñun luágu. ³Ítara líña camá ában dúbü miríti, le jáspe o cornalína, ñíñoun ában jerémuuru geyégu láu jalaú ligía, mirítu quei ában dúbü le esmerálda. ⁴Geyégu láu lála urúei ligía aríjayatina ában wein-gádürü lála urúei, ñíñanu weín-gádürü gürígia ja weírigutiña ñun luágu, táu jadáuragun jarútu lúma rídi gólu jábulugu. ⁵Lueígiñe lála Búngiu ligía áfurijati labírijanouga lúma wayújururu, ligíbugiñe lála, ñíñein sédü lámpu geméñu, jagía sédü láni Búngiu Espíritugu. ⁶Ñíñein gíñe ában cátei ligíbugiñe lála camúga ában barána le láuti bídiriu jarúgoungati.

Lamídaangua, geyégua láu lála Búngiu, ñíñanu gádürü cátaña gabágaritiña buin láu águu, dándu jagíbugiñe quei janágangiñe. ⁷Le furúmiñeti jádaangiñe, ítara líña quei ában liñún, le jabíaman, ítara líña quei ában bágasu wügüri, le júrúwan, ítara líña ligíbu quei ligíbu ában wügüri, le jagádürün, ítara líña quei ában ágila ájamajatu. ⁸Gádürügubei jagía, sísiñein arúnaü luágu cáda ában jádaangiñe, buin jáña láu águu jawágu, dándu bougudigiñe quei múnadagiñe jabíti, wéyuagu áriebru jáu agúaraja.

Sándu, sándu, sándu,

Wabúreme Búngiu, le Súnti Gabáfu,

le wínwanbei lúmagiñe lubáragiñe furúmiñeti dan, wínwan ligía guetó, wínwan ligíame sun dan.

⁹Ságüti jíchugun cátaña gabágaritiña ja inébesei lúma eteíngiruni lun Búngiu le ñúnbei luágu lála, le gabágaribei lun sun dan, ¹⁰ábaja jájuduragun wein-gádürü weíyaaña mútu jagía ligíbugiñe, ába jarúfuduni jínsiñejabu lun Búngiu le gabágaribei lun sun dan, ába jíchuguni jarídin ligíbugiñe, ába jagúarajan.

¹¹Wabúreme, Wabúngiute, garíchatibu lun berésibiruni uweíriguni, inébesei, lúma ubáfu,

ladúga Amúrü adúgübalin sun cátei,
láu bugúndan badúgei, láu gíñe bugúndan níjein lubei sun le níjeinbei.

Líburu lúma Mudún

5 ¹Ábati naríjin ában líburu lújaburugu Búngiu le ñúnbei luágu lála, abúrüjoiatu líburu tugúya turágeirugu lúma tigíbuagu, darúatu láu sédü séyu. ²Ába naríjin ában ánjeli gabáfuti, ába lálügüdajan láu umálali reínti.

—¿Ca garíchabei lun ladárarunun líburu lúma lun lajeíridunun tiséyun?

³Úati ni ában garíchati lun ladárarunun líburu tugúya, ni íbini lun laríjin tuágun, ni siélu, ni múarugu, ni lábugiñe múa, úati ni ában garíchati. ⁴Ába nayájun sarágu ladúga úa lan ni ában garíchati lun ladárarunun líburu tugúya, ni lun lalíjanun, ni íbini lun laríjinun. ⁵Ábati laríñagun ában jádaangiñe weíyaaña mútu nun.

—Jebé bayájun, ladúga Jesucrístu, le “liñún” le jádaangiñebei ladúgawagun Judá, le linébaanfan urúei Davíd, sirígua láali wuríbani lun gayára lan ladárarunun líburu lúma lun lajeíriduni sédü tiséyun.

⁶Lamídaanguati lála Búngiu jáma gádürü cátaña gabágaritiña jagía jáma weíyaaña mútu jagía, ába naríjin ában Mudún rára, camá jamuga áfarúaali. Sédüñein ligáanchun, sédü lágu, águu buri ligía, láni Búngiu sédü Espíritugu ja oúnajoubaña lídoun sun ubou. ⁷Ñúbinti Mudún ligía, le Jesucrístubei, ába lanúgünun líburu tugúya lújaburugugiñe Búngiu. ⁸Dan le lárügüdünbarun líburu, ába jájuduragun gádürü cátaña gabágaritiña jagía jáma wein-gádürü weíyaaña mútu jagía ligíbugiñe. Cáda ában jádaangiñe weíyaaña mútu jagía, ñíñoun ában gidára lúma, lúma cópu le gólu buin láu cupáli, le liyáwabei jayúmuragun lánigu Búngiu. ⁹Niján urému iséri le jerémujabei.

Garíchatibu lun banúgünun líburu, lun bajeíridunun tiséyun,
ladúga áfarúa ban, ába bagáñijaniña gürígia lídaangiñe sun rása,
sun luwúyeri dimúrei, fulásu lúma néchaani.

¹⁰Adúga báña urúeigumé jáma fádirigumé
lun jesériwidun lun Wabúngiute,
lúma lun jagúmadijan ubouagu.

¹¹Lídan le naríagun, ába nagáambuni jamálali sarágu ánjeligu geyégu láu lála lúma geyégu jáu cátaña gabágaritiña jagía, jáma weíyaaña mútu jagía. Níñanu míñun míñun ánjeligu, ¹²jaríñaga láu umálali jéreti.

Yúuti ubáfu lúma irisini, subúdi lúma érei,
uweíriguni lúma inébesei, lúma eteíngiruni lun Jesucrístu, Mudún le áfarúbei.

¹³Agáamba numúti gíñe jaríñaguni sun cátei le ladúgübei Búngiu siélu, le múarugubei, le lábugiñebei múa, lúma le baránajabei, lúma sun cátei lé buri lídaanbei.

Rúalá eteíngiruni, inébesei, uweíriguni, lúma ubáfu
lun Búngiu le ñúnbei luágu lála,

lúma lun Mudún, lun sun dan.

¹⁴Ába jaríñagun gádürü cátaña gabágaritiña jagía.

—¡Ítaralá!

Ába jájuduragun wein-gádürü weíyaaña mútu jagía ligíbugiñe le gabágaribei lun sun dan.

To sédū séyu

6 ¹Ábati naríjin dan le lajeíridúnbarun Mudún furúmiñetu tídaangiñe sédū séyu tugúya, ába nagáambun laríñagun ában jádaangiñe cátaña gabágaritiña jagía láu ában umálali camá lumálali wayújururu.

—¡Jigábu baríja!

²Ába naríjin ában gabáyu jarúti, le waríñubei luágu, ñíñoun ában arco lújaburugu to áuboun lageíndagua. Rúati ában rídi lánina ásiiraguni lun ladúga lúnbei lan lagáñeiruniña láganiñu. Furíti ageíndagua, ába lásiiragun lídan sun cátei.

³Dan lajeíridunbarun Mudún tibíaman séyu, ába nagáambun laríñagun jabíaman cátaña gabágaritiña jagía.

—¡Jigábu baríja!

⁴Ába láfuridun ában gabáyu funáti, ába líchugúniwa ubáfu lun le waríñubei luágu gabáyu ligía lun lagídaruni darángilaü ubouágugiñe, lúma lun láfaraguágüdüniña wügüriña jámagua jilágubei, ába tíchugún ában oúnwenbun efeín lun.

⁵Dan lajeíridúnbarun Mudún túrüwan séyu, ába nagáambun laríñagun júrüwan cátaña gabágaritiña jagía.

—¡Jigábu baríja!

Ába naríjin ában gabáyu wuríti, ñíñein ában baláansu lújaburugu le waríñubei luágu. ⁶Ába nagáambun laríñagun ában umálali jamádaanguágiñe cátaña gabágaritiña jagía.

—Ábanrügüla kílo türígu luágu lebégi ában wéyu wadágimanu, úrüwa kílo sebáda ligía méme ebégi, áni toúnigi jumeíme aáli lúma bínu buídu.

⁷Dan lajeíridúnbarun Mudún tigádürün séyu, ába nagáambun laríñagun jagádürün cátaña gabágaritiña jagía.

—¡Jigábu baríja!

⁸Ába naríjin ában gabáyu amaríyu, le waríñubei luágu, ouweni líribei, lárigi lárigi liábin jafúlasun jiláaña. Ába libíjin ubáfu luágu ligádürün murúsun lídaangiñe ubou lun láfarajan láu wuríbu, láu ilámaü, láu sándi, lúma jáu anímaalugu janárimetiña ja ubouágubaña.

⁹Dan lajeíridúnbarun Mudún tiseíngün séyu, ába naríjinun jawáni ja áfarawagúbaña lueígiñe japúrichijani Lerérün Búngiu, lúma luágu jadímurejan buíti luágu Jesucrístu, lábugiñeñanu latárü. ¹⁰Jaríñaga láu umálali jéreti.

—¿Darísan ídame, Wabúreme le gúnfuliti láu lerérun, darísan ídame bagúseragüdaña ja mísiñejabúbaña bun uboúagu, luágu woúnwen? ¿Ídamésan bafáyeigüdaña luágu jáfaruníwa jilágubei?

¹¹Ába jabíjin anáanguni jarútu, ába laríñawagún joun lun jeméraagun luágu murúsun dan darí jóústarun jabíriña lídan esériwiduni lun Crístu ja lúngiñabaña jáfarawagúniwa quei jagía.

¹²Lídan le naríjinbei, ába lajeíridunun Mudún tisísin séyu, ába ladágarun ában oúnwenbun járabaganáli. Ába láuridun wéyu quei lúdu, ába láfunadun játi camá jítaü, ¹³ába jeíguadun warúguma ja siélubaña lun múarugun quei táburujan mángu tueígiñe tídibu dan le lánjingichunun garábali. ¹⁴Ába lagúmuchagun siélu quei ában gárada dan le tabáruchawagún, ába ladíñuragunga sun wúbü lúma uboúju lídáangiñe jabára. ¹⁵Ába jarámudagun urúeigu ja lánina uboú lídan júyu lúma buri labádinagua dúbü le luágubei wúbü, úara jáma ja weírigubaña, gurúnelugu, rísitiña, gabáfutiña, jáma sun idámuni, jáma wügúriña ja mabúremetiña. ¹⁶Jaríñagati lun wúbü lúma lun dúbü.

—Jeígua jumá wawágun, arámuda jumáwa lueí laríjin Búngiu le ñúnbei luágu lála, lúma lueí lanárima ligáñi Mudún.

¹⁷Chülújali weíríti wéyu le lúnbei larúfuduni Búngiu ligáñi. ¿Cábasan gayára lawánduni?

Seíni jawáguti Israelítagu

7 ¹Lárigiñe sun cátei le, ába naríjin gádürü ánjeligu rára luágu gádürü larígei uboú, ágüdaajei gádürügubei garábali lun máfurun lan ni murúsun luágun múa, ni luágun barána, ni luágun ni ában tídibu wéwe. ²Aríjatina gíñe ábanya ánjeli ñúbinti lueígiñe oúbaü le ñígiñe lubeí láfuara wéyu láu liséyun Búngiu le wínwanbei. Ába lagúaragun ánjeli ligía láu umálali jéreti joun gádürü ánjeligu ja abíjubaña ubáfu lun jadúgiin wuríbani lun múa lúma barána.

³—Madúga jumá wuríbani lun múa, ni lun barána, ni lún buri tídibu wéwe daríme wíchuguni liséyun Búngiu luágu jerébe lánigu.

⁴Agáamba numúti átiriñanu lan. san bián-wein-gádürü mílu jádaangiñe linébaanfaangu Israel.

⁵Dúusu míluñanu jádaangiñe ladúgawagun Judá,

dúusu mílu jádaangiñe ladúgawagun Rubén,

dúusu mílu jádaangiñe ladúgawagun Gad,

⁶dúusu mílu jádaangiñe ladúgawagun Áser,

dúusu mílu jádaangiñe ladúgawagun Neftalí,

dúusu mílu jádaangiñe ladúgawagun Manasés,

⁷dúusu mílu jádaangiñe ladúgawagun Simeón,

dúusu mílu jádaangiñe ladúgawagun Leví,

dúusu mílu jádaangiñe ladúgawagun Isacár,

⁸dúusu mílu jádaangiñe ladúgawagun Zabulón,

dúusu mílu jádaangiñe ladúgawagun José,
jáma dúusu mílu jádaangiñe ladúgawagun Benjamín.

Sarágu gürígia jarútu jadáüragun

⁹Lárigiñe cátei le, ába naríjin sarágu gürígia lídaangiñetiña sun fulásu, sun rása, sun luwúyeri dimúrei lúma néchaani, rára jáña ligíbugiñe lála Búngiu ligíbugiñe Mudún. Gíbetiña gürígia jagía darí lun siñá lan jabájüdún, jarútu jadáüragun táu tubána fáluma jájaburugu. ¹⁰Ába jagúarajan sun jagía láu umálali jéreti, ába jaríñagun.

Weíriti Búngiu, le ñúnbei luágu lála,

weíriti Mudún, luágu asálbaruni le rújamaalíbei woun.

¹¹Rára jáña sun ánjeligu geyégu láu lála lúma geyégu jáu weíyaaña mútu, jáma gádürü cátaña gabágaritiña jagía, ába jelémuchun dagá jagíbu múarugu ligíbugiñe Búngiu, ába jájuduragun lun, ¹²ába jaríñagun.

¡Ítaralá! Rúalá uweírigu, lichú áu, eteíngiruni,

inébesei, ubáfu lúma érei

lun Wabúngiute lun sun dan. Ítaralá.

¹³Ábati lálügüdünina ában jádaangiñe weíyaaña mútu jagía.

—¿Cátañasan ja, ja jarúbaña adáüragun? ¿Jalíagiñésan jayábin?

¹⁴Naríñaga lun.

—Amürü jamúga aríñagei nun.

Laríñaga nun.

—Ja sáfuriñañabaña sarágu ja, ja chibá jamaalíbei jaffigoun láu líta Mudún, jarúmagüda jamoún janígi láu. ¹⁵Ligía ligíbugiñeñanu lubeí lála Búngiu esériwida lun, wéyuagu áriebu tídan lúban to siéluboun, loúnigirubaña Búngiu láu leréderun jáma. ¹⁶Máfagun jáñame ilámaü, ni mágürabu, másürün láñame wéyu, mañáurijan láñame lárrouga, ¹⁷ladúga loúnigirubaña lan Mudún le lubádubei lála Búngiu, ábame lanúgüniña lárün dúna le íchugubei ibágari magúmuchaditi, ábame larágajani Búngiu sun águirauí lueígiñe jágu.

Tisédün séyu lúma lágei cupáli le gólu

8 ¹Dan lajeíridúnbarun Mudún tisédün séyu to tuáguboun líburu, ába ñi lan maníguauí siélu queí buri luágu dimí óra. ²Ába naríjiniña sédü ánjeligu ja rarábaña ligíbugiñe Búngiu, ába líchugúniwa sédü fídu joun. ³Lárigiñe, ábaya liábin ában ánjeli, ába laráramun ligíbugiñe latárü, níñein ában lágei cupáli gólu lújaburugu, ába líchugún bürübün cupáli lun, lun ladágaragüdüni úara lúma jayúmuragun sun ja lánigu Búngiu ligíbuagu latárü gólu le ligíbugiñebei lála Búngiu. ⁴Ába lamúdeirun lugúmulalin cupáli ligía úara lúma jayúmuragun lánigu Búngiu lun ligíbugiñoún Búngiu. ⁵Ábati lanúgüni ánjeli ligía lágei cupáli, ába labuínchagüdüni láu leñégura wátu lídaangiñe wátu gemetí le luágubei latárü, ába lachúrüni luágubon ubóu, ába lagaambún wayújururu, ireíni, labríjaníga, lúma ában jarábaganáli.

Lé buri fídu

⁶Ábati jaráanserun sédü ánjeligu ja láubaña sédü fídu lun jínwiruni.

⁷Ába línwiruni furúmiñeti ánjeli lifídun, ába lasáliragun lúbara júya le deréguati lúma wátu geméti, láu gñe jítaü, ába lachágarúniwa luágun uboú. Ába lágudun lúruwan murúsun lídaangiñe uboú, ígirúati bián murúsun mágudúnti, gudáwati gñe lúruwan murúsun lídaangiñe buri tídibu wéwe lúma jíduru.

⁸Ába línwiruni jabíaman ánjeli lifídun, ába lachágarúniwa ában cátei camá jamuga ában oúnwenbun wúbü durúnguati baránajoun, ába lasáliragun lúruwan murúsun lídaangiñe barána jítaüme. ⁹Jiláguatiña sun úduraü ja lídaanbaña barána le asáliragubei lun jítaüme, gürínguatu gñe sun ugúnein to ñíboun lídan barána ligía.

¹⁰Ába línwiruni júruwan ánjeli lifídun, ába teíguadun ában oúnwenbun warúguma siélugiñe, durúngu quei ában tóchi. Táburuja luágun lúruwan murúsun lídaangiñe dúna lúma líseesen dúna. ¹¹Igífi tíribei warúguma tugúya, ába lagífídu lúruwan dúna, ába jóúwegun sarágu gürígia ladúga lagífídu dúna ligía.

¹²Ába línwiruni jagádürün ánjeli lifídun, ába lagúrinchagun lúruwan murúsun lídaangiñe líbiri wéyu, láu sun játi, jáma warúguma. Le oúbaü le agúrinchagubei jawágu, ába labúridun, marúgoungadunti wéyuagu ni áriebru.

¹³Lárigiñe, ába naríjin ában dunúru weíríti ájamaja lamídaangua siélu, aríñageina ligía láu umálali jéreti.

—¡Fugiábugume ja aganoúbaña uboúagu luágu úruwa lanárimeníga lé buri lúnbei láburuja jawágun dánme jínwiruni ja jíbiri úruwa ánjeligu jafídun!

9 ¹Ába línwiruni jaseíngün ánjeli lifídun, ába naríjin ában warúguma eíguadutu siélugiñe lun múarugun, ába líchugún ligélen júyu le mébejabei tun. ²Ába tánjunrenchuni júyu ligía, ába láfuridun gumúlali ñígiñe camá lídaangiñe ában oúnwenbun órno, ába labúrigadagüdüni gumúlali ligía wéyu lúma garábali. ³Lídaangiñe gumúlali ligía ába jachúlaagun chigángaru, ába jámajani sun uboú, ába jabíjin chigángaru jagía ubáfu líbe jabáfu águru ja uboúagubaña. ⁴Ába larínawagún joun lun madúgün jamá wuríbani lun jíduru le uboúagubei, ni lún buri nádü, ni lun tídibu wéwe, lueídügü joun gürígia ja úabei liseíni Búngiu jeréberugu. ⁵Majoúati lun jáfaraguniña chigángaru jagía gürígia, lueídügü lun jásüjaniña gürígia luágu seíngü játi, ítara líñati ligári jásüjan quei jásüjan águru. ⁶Lídaanme buri wéyu ligía, jáluajabei gürígia oúweni, madárijabei, busén jagía yebéme jóúwegun, ladíseduba oúweni jawéi.

⁷Chigángaru jagía, jenége gabáyu ja aráanseñubaña lubá wuríbu, ñíñein ában cátei jábulugu camá jamuga ában rídi le gólu, ítara líña jagíbu quei ligíbu wügúri. ⁸Ítara líña jádiburi quei jádiburi würiña, liábin jári, quei lári liñún. ⁹Darúgu líña jágubu láu ában cátei camá gürábu,

ítara líña lamúri jarúna quei tamúri sarágu cárü to jáutu gabáyu dan le teíbaagun wuríburugu. ¹⁰Gálitiña quei jáli águru le gágiriti. Níñein ubáfu luágu jáli lun jadúgün wuríbani joun gürígia luágu seíngü játi. ¹¹Níñein ában jábuti chigángaru jagía, le ánjeli le láni júyu le mébejabei. Abadón líribei ánjeli ligía lídan hebréo, lídan güriégu, Apolión o Agúnrinchaguti.

¹²Sügúja furúmiñeti lanárimeníga, mégeigili bián.

¹³Ába línwiruni jasísin ánjeli lifídun, ába nagáambun ában umálali lídaangiñe gádürü larígei latárü gólu le ligíbugiñebei Búngiu. ¹⁴Ába laríñagun umálali ligía lun jasísin ánjeli le láubei fídu.

—Farára báña gádürü ánjeligu ja güráñubaña láru oúnwenbun dúna le Eufrátes.

¹⁵Ába jafáragadún gádürü ánjeligu jagía lun jafaragun ában jádaangiñe cáda úrüwa gürígia jílágubei, ladúga aráanserúaña lubá óra ligía, wéyu ligía, játi ligía, lúma írúmu ligía. ¹⁶Ába nagáambuni átiriñanu lan jasúdaaranigu ja luágutiña gabáyu. bián-san mññun.

¹⁷Ítara líña ligáburi jayáwadagun gabáyu jagía jáma ja waríñubaña jawágu nun. Níñein ában cátei janíguagu, funáti licólorun, dínkuti, lúma amariýu. Ítara líña jábulugu gabáyu jagía quei jábulugu liñún, áfurijati wátu geméti, gumúlali, lúma sáfuru jayúmugugiñe. ¹⁸Ába láfaraguniña úrüwa wuríbani le áfuridubei jayúmugugiñe gabáyu jagía ában jádaangiñe cáda úrüwa gürígia jílágubei, úrüwa wuríbani ligía. wátu geméti, gumúlali, lúma sáfuru. ¹⁹Jayúmugugiñein gabáyu jagía jabáfu, lúma luágu jáli, ítara líña jáli camá jéwe gábuluguti, láu gíñe jadúga wuríbani.

²⁰Ja jíbiri gürígia ja moúwegunbaña láu wuríbani le, mígirun meme jamúti jadáaguni cátei lé buri meja jadúgübei, mígirun jamef jájuduragun joun espíritugu wuríbatiña lúma joun sándu ja gólu, pláta, brónse, dúbü, wéwe—ja siñáti jaríjin, ni jagáambun, ni jeíbugun. ²¹Mígirun jamef jáfarajan, jabíñarajan, jasálufurijan, lúma jíwerujan.

Ánjeli táu tiraúraü líburu

10 ¹Ábati naríjin ábanya ánjeli gabáfuti, ába larárirun siélugiñe lídan juánriñu táu ában jerémuru louígiñe lichúgü. Miríti ligíbu quei wéyu, liábin lúruna camá durúngu líña. ²Níñoun ában tiraúraü líburu junréngu lújaburugu. Ába líchuguni lugúdi le loúnwenren louígiñe barána, le lubaúna louígiñe múa. ³Ábati lagúaragun láu umálali jéreti quei ában liñún dan le láwoujan, dánti le lagúaragunbei, ába lagaambúniwa ladúrügüdiün sédú wayújururu. ⁴Lárigiñe ladúrügüdiün sédú wayújururu ligía, ába yebe nabúrújaali lan le laríñagubei, ába nagáambun laríñagun ában umálali nun siélugiñe.

—Maríñagabeí le laríñagubei sédú wayújururu, mabúrújabeí gíñe.

⁵Ánjeli bugáti le naríjubei louígiñe barána lúma louígiñe múa, ába liñúruni lújabu le loúnwenren siélun, ⁶ába láfiñurun luágu le gabágaribei lun sun dan, le adúgübalin ubou láu sun siélu, barána lúma sun cátei le lídaanbei, ába laríñagun.

—Úadügüyaali darásaü. ⁷Dánme le lachúlürün dan lun lagúmeserun jasédün ánjeli ínwirei lifídun, gúnfulijalíme laráansejan Búngiu lé meja arámudaguabei, quei le laríñaguni meja joun profétagu ja esériwidubalin.

⁸Ábaya ladímurejan umálali lé buga nagáambubei siélugiñe, ába laríñagun nun.

—Befba, banúgounme tiraúraü líburu to daráguboun, to lújaburuguboun ánjeli le rárabei lougiñe barána lúma múa.

⁹Ába nídin, ába namúriajanun líburu tugúya lúma ánjeli ligía, ába laríñagun nun.

—Jan, jóuboun, bímebei basándirunun biyúmulugu, tagífidame burágeirugu.

¹⁰Ába nanúgünun tiraúraü líburu tugúya lújaburugugiñe ánjeli ligía, ába neíginun, bímeti nasándirunun niyúmulugu camá síruudu, lárigiñe neíginun, ába tagífidun nurágeirugu. ¹¹Ába laríñawagúniwa nun.

—Lúnti bídinya aríñagei le lúnbei lasúseredun lun sarágu fulásu, néchaani, luwúyerigu dimúrei, lúma joun urúeigu.

Ja bián geféentiña

11 ¹Ábati líchugúniwa ában mabúru nun lenége ában wéwe le amísuraagülei, ába laríñagun Búngiu nun.

—Sarába, amísurajaboun lilígilisin Búngiu lúma latárü, abájüda báñame átiriñanu lan ja ájuduragutiña ñi. ²Mamísurajabei бүрүрү le bougudibei tibíti ligílisi ladúga derégewaali joun ja terénchabaña lun Búngiu, ja lúnbaña jagúnrinchaguni ubúru le sándubei luágu bián-wein-bián játi. ³Ábame nouñajan bián geféentiña lun jadímurejan nuágu luágu mílu bián-san úrüwa-wein wéyu, táu jadáüragun lúdu.

⁴Bián geféentiña jagía, jagía gayáwabalin bián tídi bu wéwe to olívo lúma bián lébu sanúdelu le ligíbugiñebei Búngiu, le Labúremebei sun ubou. ⁵Ánjein ñi abúseerúti ladúgün wuríbani joun, ába jígiragüdiün wátu geméti jayúmulugugiñe, ába jáguduniña jáganiñu gumúgubei. Ítarati louweba furúmieguariügü le busénti ladúgün wuríbani joun. ⁶Gabáfutiña geféentiña jagía lun jadáuruni siélu lun májuyun lan júya sun dan niján lan Búngiu adímureja jayúmulugugiñe, gabáfutiña giñe lun jadúgüni dúna jítaüme, lun giñe jasúfuriragüdiüni ubou láu sun luwúyeri wuríbani, ságü jabúseerun. ⁷Dánme le gumú jamaali jawádigimari, lageíndaguba anímaalu le áfuridubei lídaangiñe júyu le mébejabei jáma, ábame jeferidiruni wuríbu, ábame láfaruniña jilágubei. ⁸Ábame jeréderun riwágu lídan lémeri ouñwenbun ubúru le Jerusalén le ní lubei ládarawagúa Jesúsu luágu gurúwa, fulásu meme le, camá Sodóma lúma Ejípto. ⁹Ábame jaríaguniña gürgía ja lídaangiñetiña sun fulásu, sun rása, sun luwúyeri dimúrei, lúma néchaani luágu úrüwa wéyu dimí, mígirunbaña lun jábunún. ¹⁰Ábame jagúndaaragun ja ubouágubaña láu jóüwegun, daríme lun jedéweegun cátei jámagua, le jagúndan, ladúga berése jamá meja bián lánigu Búngiu jagía joun. ¹¹Ába naríjin, áu Juan, luágu lárigiñe lan úrüwa wéyu dimí ligía, ába láguyuguagüdiüniña Búngiu, ábaya

jásaarun, áni sun ja aríjúbaliña, weíriti janúfudedagun. ¹²Ába jagáambun bián geféentiña jagía ában umálali jéreti siélugiñe le aríñagubei.

—Weínjuma ñájoun siélun.

Ába jamúdeirun siélun lídan ában juánriñu, aríagu jáganiñu joun. ¹³Lídan óra ligía, ába ladágarun ában oúnwenbun járabaganáli, ába tagúluludun ában múna tidaangiñe ságü díisi to ubúruguboun, ába jóúwegun sédü mflu güriquia ladúga járabaganáli ligía. Ja jíbiri güriquia, ába jíchugun inébesei lun Búngiu le siélubei ladúga luweírin janúfude.

¹⁴Sügüja libíaman lanárimeníga, madísebei le ában.

Le lisédün fidu

¹⁵Ába línwiruni jasédün ánjeli lifídun, ába lagaambúniwa laríñagun umálali buri jéreti siélugiñe.

Chülújali lidáani Wabúreme Búngiu luma lidáani Crístu
lun jarúeijan lídan sun uboó,
áni jarúeijaba sun dan.

¹⁶Ábati jélemuchunga weín-gádürü güriquia ja weírigutiña, ja núnbaña luágu jála le lála urúei, láu jagíbu múarugu, ába jájuduragun lun Búngiu.

¹⁷Ába jaríñagun.

Teínqui wáña bun, Wabúreme Búngiu,
amúrü le Súnti Gabáfu,
amúrü le wínwanbei lúmagiñe lubáragiñe furúmiñeti dan, wínwan
amúrü guetó, wínwan amúrúme sun dan.
Teínqui wamútibu ladúga ragúbaali lan oúnwenbun bubáfu.
áni guméseedibu arúeija.

¹⁸Gáñiburija néchaanigu,
chülúja wéyu lun babeíjan,
chülúja gíñe dan lun bagúseragüdüniña jiláguaaña,
ábame bíchuguni jafáyeiruaaja báni profétagu joun,
jama jíbiri ja derégeguabaña jóungua bun, jáma sun jawúyerigu
güriquia ja íchubaña inébesei lun bíri.

Chülúja óra lun bagúnrinchaguniña ja agúnrinchagubalin uboó.

¹⁹Ábati tánjunrenchun lúban Búngiu to siéluboun, ába tarijín gáfu to lágei lidáradun Búngiu jáma lumútuniña ñi tídan lúban. Ába ñi lan labíríjaníga, ireíni, wayújururu, ában járabaganáli, luma láburujan lúbara júya deréguati le weínamuti.

Wúri luma anímaalu le dragón

12 ¹Ábati lasáliragun ában oúnwenbun seíni siélu. ában wúri darúgu líña wéyu táu camá jamuga ában dínugu, láu játi lábugiñe tugúdi, luma ában ridi jáu dúusu warúguma tábulugu. ²Wúri tugúya dageínañoun, tagúaraja láu igári le lánina agáriduni, ladúga súfuritu lun tagúriaan. ³Ábaya lasáliragun ábaya

seíni siélu. ában oúnwenbun anímaalu le dragón funáti, sédüñein lábulugu, dísi ligáanchun, lúma ában rídi luágu cáda lábulugu. ⁴Ába ladúrugudun dragón ligía ában jádaangiñe ságü úrüwa warúguma láu líli, ába lajúnruniña múarugun. Ába laráramun dragón ligía tigfbugiñe wúri to lúnboun tagúriajan, lun leígini tiraú dánme le tagúriajan. ⁵Ába tagúriajan wúri tugúya ában wügúri irájü le lúnbei ledéraagüdün lagúmadijan lídan sun fulásu queísi láu ában murúsun güirábu. Ába lagídarúniwa tiraú tueí, ába lanügúniwa lun Búngiu luágun lála. ⁶Ába tanúrajan wúri tugúya lídoun fulásu mageírawati le ní lubei aráanseeli lan Búngiu ubáraü tubá, lun toúnigirúniwa ñi luágu mflu bián-san úrüwa-wein wéyu.

⁷Lárigiñe, ába ñi lan ában wuríbu siélu, ní lubei lageíndagua árcanjel Miguél jáu láni ánjeligu lúma dragón. Ageíndaguati dragón jáu láni ánjeligu, ⁸ába jeféridiruni wuríbu, ába mabáraaña lan siélu. ⁹Ába lubeíti laságarún oúnwenbun dragón, le binádu jéwe ligíra le gíribei Máfia, o Satanási, le ayéejabalin sun uboú, siélugiñe. Ligía jáu sun láni ánjeligu, ába jachágarún múarugun.

¹⁰Ábati nagáambun laríñagun ában umálali jéreti siélugiñe.

—Gánei láali Búngiu Máfia láu luweírín lubáfu. Chülújali asálbaruni joun gürígia uboúagun, chülújali larúeijan Búngiu lúma lagúmadijan Crístu, ladúga sagáwaali le íchugubei jadúnrun wadújeñu lueígiñe Jesucrístu, le íchigañajábei jadúnrun wéyuagu, áriebe ligfbugiñe Wabúngiute. ¹¹Sirígua jamáali láu loúnwen Mudún, le Jesucrístubei, lúma láu jíchugun fe luágu láni Búngiu ugánu luágu asálbaragülei, manúfudeduntiña lueí jeféridiruni jabágari, aráanseñu rügútiña lun joúnwen. ¹²Gúndaalá lubeíti siélu, gúnda jumá jugúya le aganoúbei ñi. ¡Áni fugiábugu ja aganoúbaña uboúagu, lúma baránaja! Núdünja Máfia júmoun láu oúnwenbun igáñi, ladúga subúdi lumúti luágu murúsun rügáali lan lidáani.

¹³Dánti laríjinbei dragón luágu fíwaali lan uboúagun, ába leíbaajanun wúri tó buga agúriajaboun. ¹⁴Ába líchugún bián larúna dunúru le weínamuti tun wúri tugúya lun gayára lan tájamarun lídoun fulásu mageírawati díse lueí dragón ligía, le ñíba lubeí toúnigirúa luágu úrüwa irúmu dimí. ¹⁵Ába lewérajan dragón ligía sarágu dúna liyúmulugugiñe lun lañáradaguagüdünun wúri tugúya. ¹⁶Ába líderagunun múa wúri tugúya, ába lánjunrenchun múa, ába lachúruni sun dúna le lígiragüdübei dragón liyúmulugugiñe. ¹⁷Gáñitimaati dragón túma wúri tugúya, ába lídin ageíndagua jáma tirájüñü ja ñúdübaña láu le lubeíbei Búngiu, falájamei ugánu le láni Jesucrístu.

Ja mónsturugu

13 ¹Ába naráramun lárú béya, ába naríjin lamúdeirun ában mónsturu baránajagiñe, sédüñein lábulugu, dísi ligáanchun. Níñein rídi luágu cáda ligáanchun lúma ában íri le áubei lanábaguei Búngiu luágu cáda lábulugu. ²Mónsturu ligía lenége geígusi, ítara líña lugúdi queísi lugúdi óso, liábin liyúma camá liyúma liñún. Ába líchuguni

dragón lubáfu lúma lála lun, lúma sarágu ubáfu lun lagúmadijan. ³Ñíñein ában chaúnti luágu ában lídaangiñe lábulugu mónsturu ligía, weíriti lún yebe láfaruni jílágubei, ába lareídagun lichaúntin. Weíriti janígi sun gürígia láu mónsturu ligía. ⁴Ába jájuduragun lun dragón luágu líchugun gumádi lun mónsturu, ába gíñe jájuduragun lun mónsturu, ába jaríñagun.

—Úati ni ában quei mónsturu le, ¿cába gayára láfaruni?

⁵Ígirúati gíñe mónsturu ligía lun ladímurejan dimúrei buíti luoúgua lúma lun lanábaguni Búngiu, lúma lun lagúmadijan luágu bián-wein-bián játi. ⁶Ába ladúgün ítara, adímurejati wuríbatí luágu Búngiu, anábaleí líri, lúban, jáma ja siélubaña. ⁷Ígirúati gíñe lun lageíndagun jáma lánigu Búngiu darí lásiiragúniña, ába líchugúniwa ubáfu lun jawágu sun rása, fulásu, luwúyerigu dimúrei lúma néchaani. ⁸Ába jájuduragun sun ja aganoúbaña uboúagu lun mónsturu ligía, ja úabaña jíri bürúwañu lúmagiñe ladúgün uboú tídan líburu to lánina ibágari, to lúmaboun Jesucrístu, le Mudún le ouwebei.

⁹Le garígeiruguti lun lagáambun, agáambalá. ¹⁰Ja adáürütiña ámu, jadáürawagúba gíñe, ja áfarajatiña táu efeín, jáfarawagúba gíñe táu efeín. Ligía busén jabeí lánigu Búngiu gurásu lúma afíñeni.

¹¹Lárigiñe, ábaya naríjin ábanya mónsturu lamúdeirun múarugugiñe. Ñíñein bián gánchu luágu camá ligáanchun mudún, áni ítara líña ladímurejan camá ában dragón. ¹²Ñíñein sun ubáfu le lání furúmiñeti mónsturu lúma lun ladúgüni cátei lueígiñe loúbadina furúmiñeti mónsturu. Ába ladúgün lun jájuduragun sun gürígia ja uboúagubaña lun furúmiñeti mónsturu, le lareídagugüdübei lueígiñe chaúnti le luágubei. ¹³Adúgati gíñe oúnwenbun buri miláguru, áburujagüdati wátu gemetí siélugiñe lun múarugun jagíbugiñe gürígia. ¹⁴Lídaangiñeti miláguru buri le únbei líchugúa ubáfu lun ladúgüni lueígiñe loúbadina furúmiñeti mónsturu, ába leyéeduniña ja aganoúbaña uboúagu, ába ladúgagüdün ában liyáwa mónsturu le gawágubalin chaúnti ába lareídagun, joun. ¹⁵Ába libíjin jabíaman mónsturu ubáfu lun líchugun ibágari tun liyáwa furúmiñeti mónsturu lun tadímurejan lúma lun táfaraguniña sun ja májuduraguntiña tun. ¹⁶Adúgati gíñe lun sun lan gürígia—weínamujaña, ñúbürigiña, rísitiña, gudémetiña, idámuni, máma idámuni—lun labúrüdün líri mónsturu luágu jájabu le jóunwenren o luágu lan jerébe. ¹⁷Úati ni ában gayáraati lagáñijan ni cáta ni lalúgurajan ánjein úa líri mónsturu o linúmerun líri luágu. ¹⁸Buséntitia cátei le lichú áu, le gunfaráandati, atúriajaleí linúmerun mónsturu, le ábanbei quei líri wügúri, áni niján númeru le asálrubei lídaangiñe lílétürana íri ligía. sísi-san úrüwa-wein-sísi.

Jerémujan ja san bián-wein-gádürü mílu

14 ¹Lárigiñe líra, ába naríjini Jesucrístu, le Mudún, rára lábulugu wúbü le Sión, le siélubei. Ñíñanu san bián-wein-gádürü mílu gürígia lúma, ja bürúwañubei líri Mudún lúma líri Lúguchi jeréberugu. ²Lárigiñe, ába nagáambun

ában amúri núbinti siélugiñe camá lamúri barána, camá gíñe ladúrügüdün ában wayújururu le jéreti, ítara líña gíñe camá jamuga tamúri sarágu gidára. ³Ába jerémujan gürgia jagía ában urému iséri ligíbugiñe lála Búngiu lúma jagíbugiñe gádürü cátaña gabágaritiña jagía, lúma jagíbugiñe gürgia ja weírigutiña. Úati ni ában gayára lumúti laníchigu lerérún urému ligía gunfaráanda jaweidügiya san bián-wein-gádürü mflu ja asálbarúabaña jádaangiñe ja uboúagubaña— ⁴jagía ja mádaragúnbaña joúngua jámoun würiña, reideitiña jarúmañu, falájamei Mudún le ñfjin lumúti lídin, sálbawatiña jádaangiñe gürgia quei furúmiñeti edéweejani lun Búngiu lúma lun Mudún. ⁵Madárirúnwati ni murúsun iyéeni luágu jayumáru ladúga jarúmatiña ligíbugiñe Búngiu.

Ugánu buri le jíchubei úrüwa ánjeligu

⁶Ábati naríjin ábaya ánjeli ájamaja lamídaangua siélu, ñíñein ugánu le magúmuchaditi lúma lun lapúrichijani joun ja aganoúbaña uboúagu— joun sun néchaanigu, rása, luwúyerigu dimúrei lúma sun fulásu.

⁷Laríñaga láu umálali jéreti.

—Inébelá Búngiu jun, ru jugúyame uweírugu lun, chülúja dan lun lagúseragüdün. Judúgua jumá lun le adúgübalin siélu lúma uboú, barána lúma líseesen dúna.

⁸Ába liábin ábanya ánjeli lárigi, ába laríñagun.

—Jeígua, jeígua Babilónia to weíriguboun, ladúga tabácharuadágüdüni sun néchaani láu bínu le lánina liwíye tayúmajan.

⁹Ába liábin ábanya júrüwan ánjeli, ába laríñagun láu umálali jéreti.

—Le ájuduraguti lun mónsturu lúma tun liyáwa, ígira ligíame lun labúrüdúniwa líri mónsturu luágu lújabu o leréberugu, ¹⁰látubei bínu le lánina lanárima ligáñi Búngiu le lúnbei láburujan le gumúti luágún, ábame lasúfurirun láu wátu lúma súfuru ligíbugiñe Jesucrístu lúma jagíbugiñe ánjeligu ja sándubaña. ¹¹Laweínruba lugúmulalin wátu le asúfuriragüdübalíña lun sun dan, úabei eméraaguni ni wéyuagu ni áriebe joun ja ájuduragubaña lun mónsturu lúma tun liyáwa, o ja бүрүүһаһуеи líri jawágu. ¹²Ligía lébubei lúnti lan gagúraasun jamá lánigu Búngiu ja núdünbaña láu le lubeíbei áni falájamei Jesúsú surúñu, lun ítara meme jamá derégüdagú lídan jafíñen darí lúmoun joúnwen.

¹³Ábati nagáambun laríñagun ában umálali núbinti siélugiñe nun.

—Abúrújabeí le. “¡Gúnda jamá ja ouwetiña láu jafíñen luágu Jabúreme Jesucrístu!” Lúmagiñe óra ligía, jeméraaguba lídaangiñe jawádigimari, ábame lídin le jadúgübei úara jáma, líña Sífiri Sándu.

Lalúbajoúniwa múa

¹⁴Ábati naríjin ában juánriñu jarúti, ligíbuagu juánriñu ligía, ñun líña ában lenége Jesucrístu, le Wügúri Garaúwarügüti. Níñein ában rídi gólu lábulugu túma ában alúbagülei jamánatu lújaburugu. ¹⁵Ába láfuridun

ában ánjeli tídaangiñe lúban Búngiu to siéluboun, ába lagúaragun láu umálali jéreti lun le ñúnbei ligíbuagu juánriñu.

—Dáboun balúbagüle, ladúga chülúja dan lun alúbajani, ladúga funáali nádü.

¹⁶Ába lásügüragüdünnun le ñúnbei luágu juánriñu lalúbagüle múarugugíñe, ába lalúbajan.

¹⁷Ábayati láfuridun ábaya ánjeli tídaangiñe lúban Búngiu to siéluboun táu gíñe lalúbagüle jamánatu. ¹⁸Ábaya láfuridun ábanya ánjeli lídaangiñe latárü, ánjeli ligía, gabáfuti luágu wátu geméti le luágubei latárü ligía. Ába lagúarun lun le táubei lalúbagüle láu umálali jéreti, ába laríñagun lun.

—Dáboun balúbagüle to jamánaboun, alúbajaboún tirésini beíbei to múaruguboun, ladúga funáaru.

¹⁹Ába lásügüragüdünnun ánjeli ligía lalúbagüle múarugugíñe, ába lalúbajanun beíbei to múaruguboun, ába líchugunun lídoun ában ágei weírüti lun taríbichawagúniwa. (Míni lan líra, lanárime abeichúni le lúnbei liábin lúmagiñe Búngiu.) ²⁰Ába taríbichawagún beíbei bougudi libíti ubúrugü, ába láfuridun jítaü lídaangiñe tágei chülú lúmoun líñun jafúrenun gabáyu, úrüwa-san kilómetro geyégua.

Ánjeligu jáma jagúmujoún sédú ígei

15 ¹Ába naríjin ábanya oúnwenbun seíni siélu, weírügüdati anígi. sédú ánjeligu jáu jagúmujoún sédú ígei, ja áubaña lagúmucha ligáñi Búngiu.

²Aríjatina gíñe camá jamuga ában barána le bídiriu láu wátu geméti lídan, ññanu ja agáñeirubaliña luágu mónsturu, túma liyáwa, lúma luágu linúmerun líri, rára jáña lubádu barána le bídiriu ligía táu gidára to líchuguboun Búngiu joun. ³Ába jerémujani lerémun Moisés lé meja esériwidubei lun Búngiu, lúma lerémun Mudún, le ítarabei.

Weírüti áni buíti sun le adúga báalibei,

Wabúreme Búngiu, Súnti Gabáfu,

surúñu líña sun le badúgübei, úaragua,

amúrü le Lurúeitebei sun néchaani.

⁴¿Cábasan manúfude buéi, Wabúngiute?

¿Cábasan madímurejan buíti buágu?

Amúrü rügúñadibu mafígounjan,

jayábinba lílana sun fulásu, ábame jájuduragun bun,

ladúga arijúaali luágu buídu lan sun le badúgübei.

⁵Lárigiñeti sun cátei le, ába naríjini fulásu le sándutimaabei tídan lúban Búngiu siélu, fulásu le ñí lubei lerédera Búngiu, júnren lubéneri. ⁶Ába jáfuridun sédú ánjeligu ja jáubaña sédú ígei jagía, ñígiñe. Táuñanu janáangun líno to jarúmatu, mirí, liábin jabélitin, gólu luágu janíguagu. ⁷Ába liábin ában jádaangiñe cátaña gabágaritiña jagía, ába líchugun ában cópu gólu lun cáda ában jádaangiñe sédú ánjeligu jagía, buin líña cáda cópu láu luweírín ligáñi Búngiu le gabágaribei lun sun dan. ⁸Ába labuínchun fulásu le sándutimaabei láu gumúlali le ñúbinbei

lídaangiñe luweírigun Búngiu lúma lubáfu. siñátiti lebélurun ni ában ñíjin dari jagúmuchun sédü ígei ja jámabaña sédü ánjeligu jagía.

Cópu buri le lágei ligáñi Búngiu

16 ¹Ábati nagáambun laríñagun ában umálali jéreti joun sédü ánjeligu jagía lídaangiñe fulásu le sándutimaabei.

—Jefba áturei cópu buri láu lanárime ligáñi Búngiu ubouágun.

²Ába lídin furúmiñeti ánjeli, ába láturuni licópun ubouágun, ába lasálirun gumeín gáriti jawágu sun ja gawágubalin líri mónsturu, judúgua jagía lun.

³Ába láturuni jabíaman ánjeli licópun baránajoun, ába lasáliragun barána queísi játa jiláaña, ába jóúwegun sun cátaña ja gabágaribaña lídan.

⁴Ába láturuni jürüwan ánjeli licópun luágun buri dúna lúma líseesen dúna, ába lasáliragun jítaüme. ⁵Ába nagáambun laríñagun láni dúna ánjeli.

—Úaraguatibu láu bagúseragüdün ítara, Búngiu sándu, amúrü le wínwanbei lúmagiñe lubáragiñe furúmiñeti dan áni wínwan amúrü guetó, ⁶ladúga jagía, aseíñeigüda jamúti játa profétagu jáma ja derégeguabaña jóúngua bun, guetóti gurágüdaadibu jítaü joun, yúuti joun.

⁷Agáambatina gíñe laríñawagun lueígiñe latárü.

—Ánja Wabúreme Búngiu le Súnti Gabáfu, agúseragüdaadibu láu ísuruni lúma úaraguni.

⁸Ába láturuni jagádürün ánjeli licópun luágun wéyu, ába libíjin wéyu ubáfu lun lachúraruniña gürígia láu lísü, ⁹ába jachúrarun súngubei. Láu sun lira, masáansiragunti jagáburi, madímurejan jagía buíti luágu Búngiu, anábaguearügü jameí Búngiu le gabáfubei jawágu ígei ja.

¹⁰Ába láturuni jaseíngün ánjeli licópun luágun lála mónsturu, ába leréderun larúeijan lábugiñe lubúriga. Ába buri jágüragunun gürígia jañéñe láu igári. ¹¹Ni ítara, masáansiragunti jagáburi lun jígiruni wuríbati léñaja jadúgubei, anábaguearügü jameí Búngiu le siélubei luágu jagárigu lúma jagúmein.

¹²Ába láturuni jasísin ánjeli licópun luágun oúnwenbun dúna le Eufrátes, ába lamábeidun lun ñi lan úma lun jásügürün urúeigu ja ñúbinbaña lueígiñe oubaü le ñígiñe lubeí labouúcha wéyu.

¹³Ábati naríjin jáfuridun úrüwa espíritugu wuríbatiña liyúmulugugiñe dragón, liyúmulugugiñe mónsturu, lúma liyúmulugugiñe proféta le yéebeí, ítara jáña espíritugu wuríbatiña jagía quei júa. ¹⁴Espíritugu jagía máfianu ja adáagubaña miláguru, ába buri jáfuridun oúndaragúaña sun urúeigu ja ubouágubaña lubá wuríbu le lánina oúnwenbun luwéyuri Búngiu le Súnti Gabáfu. ¹⁵(“Toúnigi jumátia ladúga sódinibei niábin quei liábin jíweruti áriebe. Gúndaabei le agágudúañubei, nuján lanáangun luágu, lun meíbugun lan surúsu lueí jaríjini gürígia le mabúseerun lubeí lun jaríjini luágu,” líña laríñagun Jesucrístu.) ¹⁶Ábati jóúndaraguniña urúeigu lídan fulásu le gíribei Armagedón lídan dimúrei le hebreó.

¹⁷Ábati láturuni jasédün ánjeli licópun garábalirugun, ába láfuridun ában umálali lídaangiñe fulásu le sándutimaabei le siélubei. Lumálali Búngiu ligía, le ñúnbei luágu lála ñi, laríñaga.

—Adügúwaali.

¹⁸Ába ñi lan labíríjaníga, ireíni, lúma wayújururu, ába lánjingichun múa láu ában jarabaganáli, jéreti sügú láu sun jarabaganáli le dagáalibei lúmagiñe ñi jamá gürígia ligíbuagu uboú. ¹⁹Ába lafánreinragun ubúruugu weíríti le Babilónia lídan úrúwa murúsun, ába buri lagúluludun ubúruugu le uboúagubei, ába larítangun Búngiu luágu ubúruugu weíríti le Babilónia lun lájuluchagüdüni bínu le lánina abeichúni le loúnajabei lun lídan ligáñi. ²⁰Sun uboúju lúma sun wúbü, ába lagúmuchagun. ²¹Ába gíñe láburujan oúnwenbun buri lúbara júya deréguati siélugiñe jawágun gürígia, júrburiti chúlú lúmoun san líburu, ába janábaguni gürígia Búngiu luágu, ladúga ában lan abeichúni janárimeti.

Tasíadirúniwa oúnwenbun jóru

17 ¹Ábati liábin ában jádaangiñe sédú ánjeligu ja láubaña sédú cópu, ába laríñagun nun.

—Jigábu, narúfudaali tabeichún oúnwenbun jóru to ñúnboun ligíbuagu barána bun. ²Agánawaaña urúeigu ja uboúagubaña lídan salúfuri túma, bachárua jagía ja uboúagubaña láu bínu le lánina tisálufurin.

³Ába lanúgünina ánjeli ligía lídoun ában fulásu magefrawati le ayáwadagubei nun láu lubáfu Sífiri Sándu, ába naríjin ában wúri waríñu luágu ában mónsturu funáti, búrúwañu líña sun luwúyeri dimúrei le anábaguti Búngiu tuágu, sédúñein lichúgü mónsturu le uágubei tañúura, díisi ligáanchun. ⁴Wúri tugúya, gúchu lúma funáti ticólorunbei tanáangun, liábin tuwénden, gólu, dúbü buíduburiti, lúma pérta. Níñein ában cópu gólu tújaburugu buin láu tisálufurin lúma liwíye tadáagun. ⁵Búrúwañu líña ában íri teréberugu láu ában aníchigu arámudaguati. Íri le teréberugubei. “Babilónia to weíríboun, jáguchu jóru lúma sun luwúyeri iwíyeni uboúagu.”

⁶Ába nasúbudiruni luágu bacháruañoun lan wúri tugúya láu játa ja lánigu Búngiu jáma ja áfarawagúbaña lueígiñe jadímurejan luágu Jesucrístu. Dan naríjinalin cátei le, ába laweíridun nanígi. ⁷Ábati laríñagun ánjeli ligía nun.

—¿Cá uágu laweírída banígi? Nasúbudiragúdaali míni tan wúri to bun, láu sun mónsturu le anúgübarun, le sédübei ichúgü, díisi ligáanchun.

⁸Mónsturu le baríjubei, gabágariti meja, áni guetó úaali, láu sun líra, lamúdeiruba lídaangiñe júyu le mébejabei lubáragiñe lídin lídoun lagúmujoún loúnwen. Ja aganoúbaña uboúagu, ja úabei jíri búrúwañu tídan líburu to lánina ibágari lúmagiñe ladügún uboú, laweíriduba janígi dánme jaríjini mónsturu lé meja gabágaribei áni úaali, ábaya liábin.

⁹Níjein cátei ya joun ja gayáraabei gunfaráanda jamáni. Sédú ichúgü ligía, míni lan sédú wúbü le uágubei ñun tan wúri tugúya, ¹⁰sedú méme ichúgü ligía, míni lan gíñe sédú urúeigu. Seíngü jádaangiñe urúeigu jagía,

gumújali jarúeijan, ában jádaangiñe, larúeijaña guetó, le ában, miábingili. Dánme liábin jagúmujoún, larúeijaba murúsürügü dan. ¹¹Le mónsturu lé meja gabágaribei áni úaali guetó, ligía jawídünbei urúeigu, láu sun ligía lan ában jádaangiñe sédü, lárigiñeme, ábame lídin lídoun lagúmujoún loúnwen.

¹²Díisi gáncu le baríjubei, díisi urúeigu ja magúmeserungiñabaña arúeija, jabíjuba jabáfu urúeigu luágu ában óra úara lúma mónsturu. ¹³Ában lábu jarítangun urúeigu jagía, jíchugubei jabáfu lúma jarúeijan lun mónsturu.

¹⁴Jagéindaguba lúma Jesucristu, láfaragubaña jilágubei, ladúga Jabúreme sun abúremein ligía, Jarúeite gíñe sun urúeigu, áni jagáñeiruba gíñe sun lánigu ja lanúadajabaña Búngiu áni derégüdagu méme jáña lídan jafínen luágu, úara lúma.

¹⁵Ába gíñe laríñangun ánjeli ligía nun.

—Barána le baríjubei, le igíbuagubei tañúura jóru, fulásu buri, luwúyerigu dimúrei, lúma néchaani. ¹⁶Áni díisi gáncu le baríjubei luágu mónsturu, le méme díisibei urúeigu, teyéreeguduba jóru joun, ábame jígirunun fíwañu, surúsu, jeígubei túgürügü, ábame jágudunun láu wátu geméti. ¹⁷Rúlaali Búngiu tídoun janígi lun jadúgüni le labúseerubei láu júaradun lun jedéregeruni jabáfu queísi urúeigu lun jíderaguni mónsturu daríme lagúnfulirun le laríñagubei Búngiu. ¹⁸Wúri to baríjuboun, tugúya weíriti ubúругu le agúmadirubaliña lurúeitegu ubou, le giríbei Babilónia.

Teíguadun Babilónia

18 ¹Lárigiñe sun cátei le, ába naríjin ábanya ánjeli larárirun siélugiñe láu sarágu ubáfu, ába larúgoundun ubou láu límírin.

²Lagúaraguati láu umálali jéreti.

—Gumúgua, gumúgua Babilónia to weíriboun, guetó jábíñejaru máfianu, jarámudaguagüle sun jawúyeri espíritugu wuríbatíña, jádibu dunúru wíyetiña queísi wadúbi. ³Ladúga sun lan néchaanigu bacháruaaña láu bínu le lánina tisálufurin, áni agánawaaña lurúeitegu ubou túma lídan tisálufurin, alúgurajatiña buri ja ubouagubaña, rísijaña lídaangiñe luwénden toúseragun túngua.

⁴Ábayati nagáambun laríñangun ábanya umálali ñúbinti siélugiñe.

—Furíjuma Babilóniagiñe, jugúya le nánigu, mafánran jumámuga lídan tífigoun lúma lídan tabeichúniwa. ⁵Gíbeguaali tífigoun darí lun lachúlürün siélu, áni jarítaguaali Búngiu luágu luríban toúserun. ⁶Adúga jumá tun Babilónia quei tadúga joun ámu, fáyei jumoun dóbüli luef le tadúgübei. Rújuma ában uníñein le jéretimaati bián weíyaasu tun sügú láu le tíchugubei joun ámu. ⁷Súfurigüda jumoun quei méme tedéregeragun túngua lun anáanguni únguaü lúma lun agúnrinchaguni, ladúga aríñaga tan tídan tanígi. “Nun nína ya quei ában urúei, máma nugúya ában jiñáru mamaritu, masúfurirubadina gíñe.” ⁸Ligía liábinba lubei tabeichún lídan ában meme wéyu—óuweni, íruni, ilámaü—ábame tagudún láu wátu geméti, ladúga gabáfuti Wabúreme Búngiu le asíadirubarun.

⁹Lurúeitegu uboú ja aganoúbaña túma lídan salúfuri lúma irisini, jayájuba, gudémegua tugúyame joun dánme jaríjini gumúlali le lánina tagudún.

¹⁰Ábame jeréderun díse, le janúfudei lueí tabeichún, ábame jaríñagun.

—¡Fugiábu Babilónia, ubúru le weíribei, Babilónia ubúru le gabáfubei, lídaanrügü murúsun óra liábin babeíchun!

¹¹Ja alúgurajatiña buri ja uboúagubaña, ayájuaatiña gíñe, gudémegua ligía ubúru le ligía joun ladúga úaaña lan cába lan agánije ebégidinaü le janáajabei— ¹²ebégidinaü lé buri gólu, pláta, dúbü buíduburitu, pérlas, gamísa to líno to fínutu, séda, colóru buri gúchu lúma funáti, lúma gíñe sun luwúyeri fuláansu le jémeti, ílagu láuti jári léfan, fuláansu buíduburiti, brónse, gürábu, lúma dúbü miríti, ¹³canéla, cátei lé buri jémeti, cupáli, mírra, ibíñei, bínu, aáli, fulúwaaru fínutu, lúma türígu, barútiña gíñe anímaalugu ja lúntiña janáajan ílagu, mudún, bágasu, gabáyu, cárü, ásta músu, o gürígia lun jalúgurajoún. ¹⁴Jaríñaguba lun ubúru le ligía.

—¡Úaaru frúta buri to seméboun búma to jínsiñeñajáboun bun sarágu, féridi báali gíñe sun irisini lúma wénde le búmañajabei, féridiwaali lun sun dan!

¹⁵Jána ja alúgurajabálin buri cátei le áni rísijaña lídan ubúru le, jeréderuba díse le janúfude lueí labeichún, ayájuaejina, aságüríjina. ¹⁶Ábame jaríñagun.

—¡Fugiábu ubúru le weírít! ítara liñá meja quei ában wúri táu tadáüragun to líno fínutu túma anáanguni to colóru gúchu lúma funáti, láu tuwénden gólu, dúbü buíduburiti lúma pérta. ¹⁷¡Lídan murúsun óra gumúja sarágu irisini!

Sún buri tarúne ugúnein, pasajérugu, mádulungu, jáma sun ja ñadágimeinbaña baránaja, díseti jeréderun. ¹⁸Dánti le jaríjini lugúmulalin lágudun ubúru le, ába jagúaragun.

—¿Cásan meja ámu ubúru le níbei quei óunwenbun ubúru le?

¹⁹Ába jíchagun múa jábulugu, ayájuaaja, aságüríja, agúaragua.

—¡Fugiábu Babilónia lé buga weíribei! Rísijañá yebe sun ja gagúnebaña wapóru baránaja láu lirísín, áni lídaanrügü murúsun óra gürínwagua.

²⁰Gúnda jumá láu le asúseredubei lun Babilónia, amúrü siélu, júma jugúya apóstolugu, jáma profétagu, jáma sun ja lánigu Búngiu, ladúga adúgaali Búngiu gúsei jun láu lasíadiruni.

²¹Ábati liñúrun ában ánjeli gabáfuti ában dúbü le ítarabei quei ában mulí, ába láguruni baránajoun, ába laríñagun.

—Ítara lúba laráriragudúniwa Babilónia, ubúru le weíribei, marijándügüyáwalime. ²²Magaambúndügüyáwalime tamúri gidára, fídu, bémerirugu, úaañame gíñe ñadágimeintiña bídan ni ca uwúyeri, magaambúnjalime gíñe lamúri dúbü le mulí bídan. ²³Madúnraagúnjalime larúgouna lámpu bídan, magaambúndügüyáwalime areínjani le lánina maríei bídan, láu sun gabáfugüda báníña meja bání alúgurajatiña lídan sun uboú, eyéedagua báña sun néchaani láu babíñarajan.

²⁴Daríwaali játa profétagu, jáma ja lánigu Búngiu, lúma játa sun ja áfarawagúañabaña uboúagu, daríwaali játa sun jagía lídan ubúругu lé meja Babilónia.

19 ¹Lárigiñe cátei le, ába nagáambuni jamálali sarágu güirígia, jagúarajan.
¡Alelúya! Weíriti Wabúngiute le Súnti Gabáfu, ligía asálbarubaliña lánigu.

²Agúseragüdati láu úarani lúma ísuruni,
siádi láaru oúnwenbun jóru to agádeirubalin uboú láu tisálufurin,
águyugüda láali jáfarawagún lánigu tuágu.

³Ábaya jagúarajan.

—¡Alelúya! Magúmubei lamúdeirun tugúmulalin.

⁴Játi weín-gádürü güirígia ja weírigutiña, jáma gádürü cátaña gabágaritiña jagía, ába jélemuchun chülú múarugun, judúguatiña lun Búngiu le ñúnbei luágu lála, ába jaríñagun.

—¡Ítaralá! ¡Alelúya!

⁵Ábati lagaambún laríñagun ában umálali yaráfa lueígiñe lála Búngiu.
Rújuma uweíriguni lun Búngiu,
sun jugúya ja esériwidubalin,
áni inébelá jun,
weíyaaña, ñúbürigiña.

Fédu siélu

⁶Agáambayatina camá jamuga jamálali sarágu güirígia, camá lamúri sarágu dúna lúma wayújururu jéreguti, agúaraja.

¡Alelúya! Guméseeli Wabúreme Búngiu le Súnti Gabáfu agúmadija.

⁷Gúndaagua wamá, buínwama láu ugúndani, ru wagíame uweíriguni lun,

ladúga chülúja óra lun lídan jamá ában lánigu Jesucrístu lúma, le gumúti.
Aráanseña quei ában adári lubá tamárieidun,

⁸táu tanáangun líno to fínutu, jarúma, áni mirí.

Míni tan líno fínutu, ibágari le surúti, le jabágari lánigu Búngiu.

⁹Ábati laríñagun ánjeli nun.

—Babúrija. “Gúnda jamá ja amísurajoubaña lídoun fédu le lánina lúaradun Jesucrístu jáma lánigu.”

Ába laríñagun nun.

—Dimúrei buri inárüniti le laríñagun Búngiu le.

¹⁰Ába nájuduragun ligíbugiñe ánjeli ligía, ába laríñagun nun.

—Madúgabeí le, esériwiduti áu lun Búngiu quei amúrü jáma bibíriña ja afálarubalin láni Jesúsú ugánu derégüdaguñu, lun Búngiu lun bájuduragun.

Ugánu le lanúgübei Jesúsú lídoun larúgounga, ligía lébubei sun le jaríñagubei profétagu.

Le aweínjabalin gabáyu jarúti

¹¹Ábati naríjini siélu junréñu, ába lasálriragun ában gabáyu jarúti, léti aweínjabalin, Gúnfuliti lúma Inárüni, ligía líribei, ladúga láu ísuruni lagúmadija, láu gíñe ísuruni lageíndagua. ¹²Ámirijati lágu camá ligémeri wátu, ñíñein sarágu rídi lábulugu, ñíñein gíñe ában íri bürúwañu luágu, ligía rügúñein asúbudirei. ¹³Anáanguni to luáguboun, feíndiwatu láu jítaí. Lerérun Búngiu líribei. ¹⁴Jafálareiti súdeara ja siélubaña táu jadáüragun líno to fínutu, jarútu, jarúma, waríñu jagía jawágu gabáyu jarútiña. ¹⁵Ñíñoun ában efeín jamánatu liyúmulugugiñe lun láchaünguniña néchaani táu, ábame ledéraagüdüni lagúmadijan quei láu ában gürábu. Lagúseragüdübaña quei le aríbichagubarun beíbei láu lugúdi, gurágüdaleíme bínu le lánina lanárime ligáñi Búngiu joun. ¹⁶Bürúwañu líña íri le tuágu lanáangun lúma luágu liyáda. “Jarúeite sun urúeigu, Jabúreme sun abúremeigu.”

¹⁷Ába naríjin ában ánjeli rára lídan wéyu, le agúaragubei láu érei joun sun dunúru ja ájamajabaña juánriñurugu.

—Jigoúgu, oúndaragua jumá lun oúnwenbun ladíneragüdün Búngiu, ¹⁸jou jumámuga jágürügü urúeigu, gumádimatiña, jáma wügúriña ganígitiña, jágürügü gabáyu jáu sun ja aweínjabaliña, jágürügü sun jawúyeri wügúriña dándu ja jóunguatiña quei ja idámuni, dándu ñúbürigiña quei weínamujaña.

¹⁹Ábati naríjini mónsturu jáma lurúeitegu uboú jáu jánigu oúndaraguaaña lun jageíndagun lúma le waríñubei luágu gabáyu jarúti jáma lánigu. ²⁰Ába ladaürün mónsturu úara lúma proféta yéeti lé buga adúgübei miláguru ligíbugiñe mónsturu. Láu buri miláguru ligía, ayéeda láaña proféta ligía ja ígiraguagüdübaña jóungua lun labürüdün líri mónsturu jawágu, judúgua jagía tun liyáwa. Dánduti mónsturu quei proféta yéeti ligía, ába jagurún wínwañu lídoun lagúnu le láubei wátu geméti lúma sáfuru. ²¹Ja jíbiri, ába jáfarawagún táu efeín to liyúmuluguboun le waríñubei luágu gabáyu, ába jaquímuledun sun dunúru buídu láu jágürügü.

Le mílu irúmu

20 ¹Lárigiñe, ába naríjin ában ánjeli larárirun siélugiñe láu ligélen júyu le mébejabei, lúma ában oúnwenbun güringüri lújaburugu. ²Ába lárügüdüni ánjeli ligía dragón, le binádu jéwe, le Máfiabei áni Satanási, ába lagúraguni luágu mílu irúmu. ³Ába láguruni lídoun júyu le mébejabei le ñí lubei ladáürei. Ába lichugún ában séyu luágu béna lun mayéejandügüya láaña lan néchaanigu darí lásügürün mílu irúmu. Lárigiñeme mílu irúmu ligía, lígiragüdúwaba luágu murúsun dan.

⁴Ába naríjini jála buri ja íbójubaña ubáfu lun jagúseragüdün, ñun jáña luágu. Aríja numútiña gíñe jawáni já meja adúrürübaña ichúgü lueígiñe japúrichijani Lerérun Búngiu lúma lueígiñe jadímurejan luágu Jesucrístu, ja

májuduragunbaña lun mónsturu ni tun liyáwa, mígirun jagía lun lichugún líri luágu jerébe o luágu lan jarúna. Ába naríjin jásaarun lídaangiñe ouweni lúnya jabágaridun, ába jagúmadijan úara lúma Crístu luágu mflu irúmu. ⁵Ánjeinti ja jíbiri jiláguaaña, másaaruntiña lídaangiñe ouweni daríme lárigiñe mflu irúmu. Niján furúmiñetibeí ásaaruni lídaangiñe ouweni. ⁶Gúndaatiña áni lánigu Búngiu jagía ja gafánraanbaña lídan furúmiñeti ásaaruni lídaangiñe ouweni! Mabáfuti libíaman ouweni jawágu, lubáragiñe líra, fádirigubaña lání Búngiu lúma lání Crístu, ábame jagúmadijan úara lúma Crístu luágu mflu irúmu.

⁷Dánme sügújali mflu irúmu ligía, ligíame lígirawagüdún Máfia lídaangiñe júyu le mébejabei, ⁸ábame láfuridun lun layéejaniña néchaanigu lídan sun uboú. Láfuriduba ayéedaña ubáfu buri le Gog lúma Magóg, ábame loúndaraguniña jánigu, ja gibebaña quei liságounte barána, lun wuríbu. ⁹Ítara líña lubeiti, ába jáfuridun súdeara jagía lídaangiñe sun uboú, ába jegéyedaguni fulásu le ñi jabei lánigu Búngiu lúma ubúru le jínsiñebeí lun Búngiu, le Jerusalénbei. Ába loúnajan Búngiu wátu geméti siélugiñe, ába láguduniña gumúgubei. ¹⁰Máfiati le ayéedubaliña, ába lágurúniwa lídoun lagúnu le láubei wátu geméti lúma súfuru, le ñíjin lubeí jágurúa mónsturu lúma proféta yéeti. Jasúfuriruba ñi wéyuagu, áriebru lun sun dan.

Wísiyu ligíbugiñe oúnwenbun jalaú jarúti

¹¹Ábati naríjin ában oúnwenbun jalaú jarúti, ñíñein Búngiu ñun luágu. Ába lagúmuchagun siélu lúma uboú ligíbugiñe, ába maríjínjali lan. ¹²Ába naríjiniña jiláguaaña, weínamujaña jáma ñúbürigiña rára ligíbugiñe Búngiu, ába tadárawagún líburu buri túma ábanya líburu to líburu to lánina ibágari. Ába jagúserawagüdún jiláguaaña luágu buri cátei lé meja jadúgübei, según le bürúwañubei tídan líburu buri tugúya. ¹³Sarátiña sun ja añáradagubaña dúnarugu, sun ja jiláguañabaña, ába jásaarun lídaangiñe ouweni, ába jagúserawagüdún luágu buri cátei lé meja jadúgübei. ¹⁴Ába lágurúniwa ouweni lúma jabára jiláguaaña lídoun lagúnu le láubei wátu geméti. Lagúnu láuti wátu geméti ligía, ligía libíamabei ouweni, ¹⁵ñíjin jagurúa ja úabei jiri tídan líburu to lánina ibágari lun jasúfurirun ñi gumúgua dan.

Iséri siélu lúma iséri uboú

21 ¹Lárigiñe, ába layáwadagun iséri siélu lúma ában iséri uboú nun, gumúgua buga furúmiñeti siélu lúma furúmiñeti uboú áni úaali buga barána. ²Au Juan, aríja numúti ubúru biníwati le iséri Jerusalén, larárirun siélugiñe lúmagiñe Búngiu. Aráanseñu líña quei ában adári dáüguañu lubá tadári. ³Ába nagáambun laríñagun ában umálali jéreti siélugiñe.

—Aríjabá, agánawati Búngiu jádan gürígia guetó. Laganoúba jáma, jagíaba lánigu, Búngiu mémeba jáma lun ligía lan Jabúngiute.

⁴Larágajabei sun jáguira, úaalíme ouweni ni ayájuni ni íruni ni igárigu, ladúga sügúja sún meja cátei le níjeinbei.

⁵Ábati laríñagun Búngiu.

—Aríjabá, adúga numúti sun cátei isérime.

Aríñagati gíñe.

—Babúrija, ladúga inárüniti dimúrei buri le, áni gayáraati lafiñnerún luágu.

⁶Lárigiñe, ába laríñagun nun.

—Súnja nadúgüni sun cátei le. Áu lagúmesejabei sun cátei, áu gíñe lagúmujoúnbei, quei létüra ‘A’ lúma ‘Z’. Le mágürabuti, níchuguba lun lun látun lídaangiñe líseesen dúna le íchugubei ibágari, mafáyeijaanga luagu. ⁷Ja ásiiragúbalin wuríbani jerésibirubei sun le lúnbei jabíjini quei jalágaante quei nirájüñü, áume Jabúngiute, jagíame nirájüñü. ⁸Ánjañati ja janúfudebaña, ja mafíñebaña, ja iyéreejabúbaña, ja gáfarajadibaña, ja adáagubaña salúfuri, ja abíñarajabaña, ja ájuduragubaña joun sándu, jáma ja yéebaña, jágurúba lídoun lagúnu le súbei láu wátu geméti lúma súfuru, le libíamabei oúweni, ligíaba jalágaante.

Iséri Jerusalén

⁹Ábati liábin ában jádaangiñe sédü ánjeligu ja láubaña sédü cópu buin jáu sédü jagúmujoún ígei, ába laríñagun nun.

—Jigábu, narúfudaali jagefra lánigu Jesucrístu bun.

¹⁰Ába layáwadaguagüdüni Sífiri Sándu ában wúbü nun, weíriti, íñu, ába larúfuduni oúnwenbun ubúru gu biníwati le Jerusalén nun, larárirun siélu giñe lúmagiñe Búngiu. ¹¹Ámirijati ubúru gu ligía láu larúgounga Búngiu, ítara líña límirin quei límirin ában dúbü buídumeraüti, quei dúbü le jáspe, jarúgoungati quei bídiriu. ¹²Ñíñein ában baríeru weíriti, íñu, láu dúusu béna geyégu láu ubúru gu ligía, ában ánjeli luágu cáda béna, lúma jíri dúusu türi bu ladúgawagun Israél бүрүүһаһу luágu buri béna. ¹³Ürüwañein béna lueígiñe le ñígiñe lubéi labóucha wéyu, ürüwa lueígiñe nórté, ürüwa lueígiñe sur lúma ürüwa lueígiñe oúbaü le ñígiñe lubéi lálüda wéyu. ¹⁴Baríeru ligía, ligíbuaguñein dúusu dúbü lidérebuguñein, láu jíri dúusu láni Crístu apóstolugu бүрүүһаһу luágu.

¹⁵Ñíñein ában mabúru gólu lúma ánjeli le adímurejabei núma lun lamísurajani ubúru gu, lubéneri, lúma lubárierun. ¹⁶Ubúru gu ligía, ába lábu lidábuberen lúma limígifen. Ába lamísurajani ánjeli ligía ubúru gu láu lumáburu, bián-míflu bián-san kilómetros luweírin, ába lábu limígifen lúma líñun, lúma lidábuberen. ¹⁷Lárigiñe, ába lamísurajani baríeru, ürüwa-wein-gádiürü métros luweírin según jamísuraagüle güirígia le layúsuruubei ánjeli ligía.

¹⁸Láu dúbü le jáspe ladúgüwa baríeru ligía, ubúruguti ligía, láuti gólu le tímatimaati, mirítí queísi bídiriu le jarúmati. ¹⁹Wéndegüdáwati lébu baríeru ligía láu sun luwúyeri dúbü buíduburiti. le furúmiñeti, láu jáspe, le libíaman, láu saffro, le lúrüwan, láu ágata, le ligádürün, láu esmerálda, ²⁰le liseíngün, láu ónise, le lisísín, láu cornalína, le lisédün, láu crisólito, le liwídün, láu berílo, le linéfun, láu topásio, le lidíisin, láu crisoprása, le liúnsun, láu jasínto, léti lidúusun, láu amatísta. ²¹Dúusugubei béna ligía,

dúusu pérلاس, cáda béna láu ábanrügü pérла ladügüwa. Léti úma buri láni ubúругu ligía, láuti gólu jarúgoungati quei bídiriu.

²²Maríjintina ni ában ligílisi lídan ubúругu lídan, ladúga añájein Wabúreme Búngiu le Súnti Gabáfu lúma Jesucrístu ñi, mabúseerúnwatu ligílisi le ñí jabei. ²³Memégeirunti ubúругu ligía larúgounga lúmagiñe wéyu ni lúmagiñe játi, ladúga le guánarü larúgounga Búngiu rúti larúgounga lun, léti Jesucrístu, ligía lilámpunbei ubúругu ligía. ²⁴Jefbuguba sun néchaanigu ja sálbawañabaña lídan lilámpun ubúругu ligía, ábame janúgüni lurúitegu uboú jaweírigun ñíjin, lun jíchuguni lun Búngiu. ²⁵Madáurawagunbei lubéneri wéyuagu, úabei gíñe áriebe ñi. ²⁶Lanügüba jaweírigun néchaanigu ñíjin, láu sun jarísín, ²⁷mebélupei ni cáta wíyeti ñíjin, ni le adúgüti cátei le wuríbati o gayéeraguati. Ja rügübaña бүрүwаñubaña íri tídan líburu to lánina ibágari to lúmaboun Jesucrístu, jagía rügübaña ebélura.

22 ¹Ábati larúfudun ánjeli ligía ában dúna jarúmati nun, le íchugubei ibágari, jarúgoungati quei bídiriu, lídaangiñe lála Búngiu lúma lála Jesucrístu láfurida. ²Ñíñein dúna ligía lamídaangua lémeri ubúругu ligía, áni luágu bián louba dúna ligía ñi laweírida buri tídibu wéwe le íchugubei ibágari, le agíndubei dúusu weíyaasu lídan irúmu. Ságü játi lagíndun, léti lubána, seríwiti lun lagáranijoún joun néchaanigu. ³Úaalíme ni cáta ñi lun lábugiñe lan líñaragun Búngiu. Ñíbei lála Búngiu lúma lála Jesucrístu lídan ubúругu ligía, ábame jájuduragun lánigu lun. ⁴Jagágibudaguba lúma Búngiu, ñíbei gíñe líri jeréberugu. ⁵Úaalíme áriebe ñi, ja aganoúbaña ñi, memégeirunbaña ligémeri lámpu ni ligémeri wéyu, ladúga larúgoungadagüdüba Wabúreme Búngiu jáu, ábame jagúmadíjan sun dan.

Madíseeli liábin Jesús

⁶Lárigiñe, ába lariñagun ánjeli ligía nun.

—Inárüniti dimúrei buri le, áni gayáraati lafíñerúniwa luágu, áni Wabúreme Búngiu méme le íchugubei dimúrei joun profétagu óunaja láadina lun narúfuduni le lúnbei lasúseredun joun lánigu madíse.

⁷—¡Arija jumál! ¡Anáte madíse! líña lariñagun Jesucrístu.

¡Gúndaalá le adúgübei gásu láu ugánu le láni Búngiu le бүрүwаñubei tídan líburu to!

⁸Áu Juan, agáamba numúti, aríjaneí buri cátei le, áni lárigiñe naríjini lúma nagáambuni, ába nájuduragun lubádu lugúdi ánjeli le arúfudubalin nun. ⁹Ába lariñagun nun.

—Madúgabeí le, esériwiduti lun Búngiu áu quei amúrü jáma bibíriña ja profétagu, jáma sun ja adúgübaña gásu láu le бүрүwаñubei tídan líburu to, lun Búngiu lun bájuduragun.

¹⁰Aríñagati gíñe nun.

—Marámudabeí láni Búngiu ugánu le бүрүwаñubei tídan líburu to ladúga yaráfaali dan lun lagúnfulirún. ¹¹Ígirabeí le wuríbabeí lun lasgírun

adáagua wuríbani, le wíyebai, lun lasígirun lídan liwíye, ánjeinti le buídubai, buídumemelá, áni le wígúri le deréguabei lúngua lun Búngiu, gúnfulimemelá.

¹²—Ánja, madíseeli niábin, líña laríñagun Jesucrístu, áni barú numuti afáyeirujauí le lúnbei níchuguni lun cáda ában según buri cátei le ladúgübei. ¹³Áu furúmiñetibei lúma agúmujoúni, lagúmeseja sun cátei lúma lagúmujoún quei létüra ‘A’ lúma ‘Z’.

¹⁴Gúndaatiña ja achíbubalin jafígoun lun garícha jamá lun jeígin lídaangiñe lin tídibu wéwe le íchubai ibágari, gayára lámuga jebélurun lueígiñe lubéneri ubúrugü. ¹⁵Ánjaña ja maffíneradibaña luágu Jesucrístu, ja abíñarajabaña, ja adáagubaña salúfuri, ja gáfarajadibaña, ja ájuduragubaña joun sándu, jáma sun ja jínsiñejabúbaña lun eyéeraguni, jeréderuba bougudi.

¹⁶—Áu Jesúsu, oúnaja náali nání ánjeli lun lasúbudiragüdüni sún buri cátei le joún buri tílana ligílisi. Áu linébaanfan urúei David, áu gíñe queísi warúguma to lánina bináafin.

¹⁷Aríñagati Sífiri Sándu jáma ja lánigubaña Jesucrístu.

—Jigábu lun Jesucrístu lun basálbarun.

Le gíñe agáambubai, aríñagalá.

—Jigábu lun Jesucrístu, sálba bámuga.

Le mágürabubai, ánjein busén, nübinlá, gurála lídaangiñe dúna le íchugubai ibágari, mafáyeijaanga luágu.

¹⁸Sun ja agáambubalin láni Búngiu ugánu le búrüwañubai tídan líburu to, wéridi numútiña lueí cátei le. le íchuguti lánwoun cátei le, lagánwoundagüdübaña Búngiu ígei ja uágubaña labúrújoúa tídan líburu to, luágu. ¹⁹Le gíñe agídaruti som cátei lídaangiñe láni Búngiu ugánu le búrüwañubai tídan líburu to, lagídarubai gíñe lufánran lídaangiñe lin tídibu wéwe le íchugubai ibágari, lúma lídaangiñe ubúrugü sándu lé buri búrüwabei uágu tídan líburu to.

²⁰Le asúbudiragüdübalin buri cátei le, aríñagati.

—Ánja, madíseeli niábin.

Ítaralá. ¡Jigábu Wabúreme Jesúsu!

²¹Binílaün Wabúreme Jesucrístu sun jugúya. Ítaralá.